

Giuseppe Calligaris (1876-1944)¹: un neurolic antesignan de metapsichiche

B R U N O L U C C I *

Ristret. Fi di Giuseppina Stampetta e dal dotôr Domenico Calligaris di Magredis, Giuseppe Calligaris – destinât a deventâ un dai personaç plui discutûts de Neurologie taliane inte prime metât dal vîncesim secul – al nas a Fors di Sot (Udin), dulà che il pari al è miedi condot, ai 29 di Otubar dal 1876. Laureât tal 1901 in medisine cuntune tesi dal titul, che al anticipe i siei interès a vignî, *Il pensiero che guarisce*, tal 1902 si trasferîs a Rome come assistent dal Prof. Mingazzini. Lis primis publicacions a van daûn dai orientaments de ricerche neuropsichiatriche di chê volte: in particolâr, tal 1908 al presente une comunicazion ae Accademie mediche di Rome dal titul *La metamateria sensitiva spinale* dulà che al sosten che la piel dal om e je dividude in liniis che a cjalin in cuatri direzions: orizontâl, trasversâl, oblique drete e çampe. Il president de Academie Prof. Bacelli al no-menâ une comission par verificâ i risultâts, che no vignirin confermâts; ad ogni mût al fo conseât al autôr di là indenant intes ricerçis. Tal 1909 al oten la libare docence in Neuropatologie e in chel stes an al devente co-segretari dal Congrès de Societât dai Neurolics Taliens. Simpri ta chel an al torne in Friûl, vierzint a Udin, adun cul pari, une “Casa di cura per malattie nervose e del ricambio”. Al partecipe ae prime Vuere mondial tant che uficiâl miedi, une esperience che i permetarâ di publicâ *Un medico e la guerra* (1922). Tal 1927 al pubbliche *I riflessi nelle lesioni del sistema motorio extrapiramidale* che al sarà une vore doprât come test di studi. E je dal 1928 la leture ae Accademie di Udin su *Le catene lineari del corpo e dello spirito* li che al teorize la presince su la superficie dal cuarp di cjadenis liniârs e plachis cutaniis che, se stimoladis in maniere oportune, a reclamin rifles cutanis internis (*vis-sarâi*) e cutanis psichics. Chescj sistemis cutanis a vegnîn cjapâts dentri di un complès procès di radiazions universâls che a àn corispondence tal pinsir de persone: e nas cussì la premesse poi studis di telepatie e dai fenomens metapsichics che a caraterizin l'ultin periodi de sô instancabile produzion scientifice, lade indenant fin ae sô muart avignude a Magredis tal 1944.

Peraulis clâf. Giuseppe Calligaris, metapsichiche, riflessologie.

** Neurolic Primari Emerit, Pordenon, Italie.
E-mail: bruno.lucci@alice.it

Introduzion. *Il pensiero che guarisce* al jere il titul de tesi che Giuseppe Calligaris, intal Jugn dal 1901, si laureà in Medisine e Chirurgjie ae Universitât di Bologne, vuidât dal Prof. Augusto Murri (Fermo 1841 – Bologna 1932), professôr di cliniche mediche dal 1877 al 1916.

Il titul de tesi e l'an che e ven discutude no pue din no disveâ curiositat e interès su la ativitat a vignî dal neolaureât. A son i agns che e nas la psicanalisi: intal 1895 Freud e Breuer a publichin *Studien ueber Hysterie* (Studis sul isterism), dulà che a son za contignûts i principis de psicanalisi, e intal 1900 Freud al pubbliche *Traumdeutung* (La interpretazion dai siums).

La tesi originâl manuscrive su 54 sfueis, di chescj un di bibliografie, e je stade cjatade tal archivi dal ateneu di Bologne e e mertarès un studi aprofondît. Bielzà inte seconde pagjine si lei une afermazion di modernitat straordenarie par chei temps: “a dispiet di cheste cuotidiane e simpri gnove floridure terapeutiche, cundut che a sedin nassudis e coltivadis la farmacoterapie, la eletroterapie, la idroterapie, la massoterapie, la pneumoterapie, la sieroterapie e v.i., sferis dutis gnovis o antighis, nô o pensin che e sedi masse trascurade par no dî scognossude e ignorade une ultime: e cheste e je la psicoterapie”.

La vite. Giuseppe Calligaris al nassè a Fors di Sot in Cjargne ai 29 di Otubar 1876, primarûl di trê fîs, dal dotôr Domenico, miedi condot di Fors, e Giuseppina Stampetta, ducj i doi di Magredis (Udin). Chei altris fradis a jerin Ferdinando, inzegnîr, che al cuistà une cierte nomee pe progettazion di struturis antisismichis e par vê publicât i siei mûts di viodi su lis teoriis de espansion dal univiers, e Plinio, resonîr, che al lavorà tal forest.

Giuseppe al passà la zoventût in Cjargne; si iscrivè ae Facoltât di Medisine di Bologne, dulà che si laureà cul massim dai vòts intal 1901.

Intal 1902 si trasferì a Rome prime come assistent e daspò come aiût intal laboratori di Anatomie patologiche dal Manicomi di Santa Maria della Pietà di Rome direzût dal famôs prof. Mingazzini (1859-1929).

Jenfri il 1905 e il 1909 al publicà almancul 15 lavôrs lant daûr des direzions de ricerche neuropsichiatriche contemporanie, ma cuntune atenzion particolâr ai sistemis sensitifs, fasint za trasparî la direzion dai siei studis seguitifs: za tal 1908 al presentà lis sôs ricerçjis ae Academie me-

diche romane ae presince dal prof. G. Baccelli, che al nomenà une commission par verificâ i risultâts esponûts.

Intal 1909 al otignì la Libare docence in Neuropatologie e al fo segretari al Congrès de Societât Taliane di Neurologie; intal stes an, di bot e par motîfs mai saltâts fûr, al bandonà la cariere universitarie e al tornà in Friûl, a Udin, dulà che cul pari al vierzè la Casa di cura per malattie nervose e del ricambio, dulà che il fradi Plinio al jere diretôr aministratîf.

La esperience come ufiçial miedi al temp de Grande Vuere i ispirà *Un medico e la guerra*, poderôs volum di ricuarts, di osservazions e di esperiençis umanis, publicât intal 1922, e plui indenant al partecipâ ae stesure di *La sagra del medico*, volum celebratîf publicât pe inaugurazion a Firenze di un monument dedicât ai miedis colâts in vuere.

Daspò de parentesi de vuere al cjapà di gnûf in man i studis científics e intal 1927 al mandà in stampe *I riflessi nelle lesioni del sistema motorio extrapiramidale* che al sarà une vore doprât come libri di test, procurantji la amirazion di Mingazzini e fasintlu deventâ une vore cognossût. Ma a son soredut lis sôs ricercjîs personâls sul teme des “liniis cutaniis iperstetichis” presentadis tal 1928 e 1929 ae Academie di Udin, che lu fasin ritignî un esponent internazional de parapsicologije.

Il so bon non lu puartà a jessi un dai perîts al procès dal “smemorato di Collegno”, ogjet di une lungje conte di Leonardo Sciascia in *Il teatro della memoria* e di un famôs film di Totò.

Sul imprin dai agns Trente, lis sôs publicazions a verin come argoment principál la telepatie e la parapsicologije. In dut al scrivè une ventine di volums e plui di cincuante articui su rivistis talianis, todescjis e francesis.

Lis sôs distraziôns a jerin chê de leture, massime chê dai classics antîcs, e la cetre che al sunave su la terace de sô cjase di Magredis, gjoldint il panorame.

Al lavorà e al scrivè fin ae muart che e rivà pes complicancis dal dia-bete ai 31 di Març dal 1944.

Lis cjadenis liniârs dal cuarp e dal spirt. Za inte prime fase de sô ati-vitât, e in particolâr inte memorie *La metamateria sensitiva spinale* dal 1908 presentade ae Academie mediche romane, Calligaris al rivave a une conclusion che e risultarà determinante pes ricercjîs seguitivis: la piel dal

om si presente dividude in liniis speciâls, che a cjalin in cuatri direzions: verticâl, trasversâl, oblicue drete e çampe. Ducj i disturps obietîfs de sensibilitât a scuegnin jessi incuadrâts in cheste trame regolâr, che e invulu-ce la superficie dal cuarp.

Intes dôs leturis ae Academie di Udin, la prime tal 1928 e la seconde tal 1929, al da cuarp ae sô teorie su *Lis cjadenis liniârs dal cuarp e dal spirit*.

Calligaris al aferme che, stimolant par mieç di corints di Faraday di debule intensitat o par sfreament determinadis zonis dal cuarp, che si ripetin in plui parts su dute la superficie cutanie daûr di criteris gjeometricos esats, a vegnin stimolâts no dome determinâts sistemis gnervôs primaris, ma ancje orghins internis, e a vegnin reclamâts ancje sintiments e sensazions precîs.

La piel e presente liniis primariis orientadis che si corin daûr, retiliniis e paralelis, par dut il cuarp, a distance di cirche 1 cm, e si ripetin in se-riis regolârs di 10 cm, simpri cu la stesse frecuence. La crosere des liniis trasversâls cun chês verticâls e forme cuadrâts di cirche 1 cm di lât.

Su la linie assiâl dai cinc dêts a corin cinc di chestis liniis, cussì come che a 'nt corin cuatri jenfri i spazis tra i dêts; la prime linie invezit al è chê laterâl che e divît la part anteriôr di chê posteriôr de man e che, lant indenant tal cuarp, e ven clamade linie de dissociazion.

Partint de prime linie verticâl, chê de dissociazion, o ciatìn par ordin la linie dal amôr che e cor sul as di mieç dal poleâr, la linie numar doi clamade de dismementeance che si ejate tal spazi tra poleâr e indiç, la numar trê o de memorie sul as dal indiç, la cuatri dal odi, la cinc de associazion mentâl, la sis dal dolôr, la siet dal plasê, la vot de calme e dal sium, la nûf de emozion e in fin la dîs de dissociazion mentâl. Lis stessis liniis si corin daûr in sens orizontâl, a plomp rispiet a chês assiâls. Chestis dîs liniis a provochin a lôr volte riflès sui orghins internis corispondents: i riflès "cutanis vissarai" par altri za cognossûts dai fisiolics di in chê volte.

Cun di plui, Calligaris al coleghé chestis liniis ancje a determinâts sintiments e contignûts psichics tant che l'amôr, l'odi, la pôre, la calme e v.i.: i riflès "cutanis psichics".

A chestis liniis ur darà il non di "cjadenis liniârs dal cuarp e dal spirit"; inte crosere di chestis cjadenis si ciatin lis "plachis".

Par "cjariâ" liniis e plachis Calligaris al doprave une corint lizere, o

pûr semplicementri un martielut dotât di cilindruts cun superficie perfelementri plane e di diametri variabil dai 8 ai 15 mm: il complès di chescj struments a costituivin la “Trousse du Dr. G. Calligaris”.

Pat Calligaris, lis cjadenis liniârs dal cuarp e dal spirt si rifletin “in mût predestinât, cun regulis fissis e precision infalibile, intal mont de Psiche”: cheste trasmission e salte fûr di une regule gjeometriche e e je comandade di leçs rigorosis simpri compagnis. Par chest “bisugne rindi neurologjiche la psichiatrie”: “dut al è fis, dut al è regolât, dut al è mathematic in chei complicâts ma perfetissims zûcs funzionâi des cjadenis liniârs dal cuarp e dal spirt”.

Ducj i sintiments dal spirt, nissun escludût, si noti ben, a àn une lôr rapresentazion ordenade e precise, sedi su la superficie de piel dal om se-di ancje intai orghins internis. Chest al è il fat fondamentâl.

A partî dai agns Trente lis sôs publicacions a verin come argoment principâl la telepatie e la metapsichiche.

Osservazions conclusivis. Mot di une grande fuarce emotive, Calligaris al relazionà ae Academie di Udin su lis “rivelazioni sorprendenti” che lis sôs ricercjis i vevin dât, causant une svolte decisive al so pinsîr.

Lis rivelazions no rivuardavin ni la nozion de distribuzion particolâr de sensibilitât cutanie che e sta ae base des cjadenis liniârs (che e contraste cu lis osservazions clinichis de neurofisiologjie, cognossudis za in chê volte), ni chê dal rapuart piel-orghins-psiche (che al ricuarde la acupunture za introdote in France e in Europe ae fin dal Votcent e che al anticipa concets de psicosomatiche), ma la intuizion, che daspò e deventarà par lui une ciertece, che lis cjadenis liniârs e lis plachis no son nuiatrici che “i lûcs di passaç des radiazions che a rivin di chei altris oms e di dut l'univiers e di jessude des radiazions che a corispuindin al pinsîr de persone”: la vision dal mont di Calligaris si oriente viers di un panpsi-chisim che al ricuarde la filosofie de nature dal XVIII secul.

O sin devant di une imagjin di casualitât mecaniche (materie e moviment) cuntun unic principi a determinâ il mont che e fâs vignî a ments la mancjance di cussience mental di De Clerambault, mecanism automatic dulà che psicologjie e psicopatologjie a son un mosaic di fenomens formâts in maniere mecaniche.

Su cheste intuizion/ciertece il Calligaris al fonde, intal tierç e ultin pe-

riodi di ativitât, lis sôs ricercjis, caraterizadis di osservazions sui fenomens paranormâi (telepatie, strolegament, metapsichiche). Il so sens critic al ven sometût dal imaginari, dulà che al opere un pinsîr in ciertis parts ancjemò logic, ma che al esclût de sô sfere dut chel che al è in contrast o che nol centre cu lis sôs intuizions/ciertecis iniziâls.

Al tignive rapuarts epistolârs cun Lakhovsky, un dai fondadôrs de gjeobiologje, e cun Leprince, autôr di un manuâl di telepatie, ma e marravee la mancjance di confronts su argoments psicologjics che in chê volte a vignivin tratâts di personalitâts di grant non come Freud, Jung e von Monakov.

Par ce che al tocje lis verifichis dai siei esperiments, che i son stadis domandadis plui voltis tal ambient scientifc, si scuen dî che Calligaris stes, descrivint lis modalitâts che a vignivin eseguidis lis sôs sperimentazions, al met in evidence che i sogjets a jerin in gjenar une vore sensibii e dacuardi, o pûr cun dams neurologjics grâfs: cheste e je la reson principâl de lôr dificoltât di riproduzion e duncje di jessi convincentis.

O concludin disint che cualchi sô concezion e lasse di sigûr perplès; e o ritignìn che il miedi, inte ultime fase de sô opare, al somee che si anuli e al vadi oltri, no te sfere de filosofie, come che al disè il prof. Gherardini che i fo amì, ma intal imaginari.

Bibliografie

- Lucci B. (2007). Giuseppe Calligaris (1876-1944): un neurologo eclettico. *Rivista italiana di neurobiologia, Atti del XLVII Congresso Nazionale della SNO*, Torino, 14-17 Novembre.
- Pessina G., Lucci B. (1988). Filosofia della natura, meccanicismo e immaginazione in G.Calligaris. In Fornasir G. (Ed) *Eminent figure di medici del XIX e XX secolo in Friuli*. Udine: Accademia di Scienze Lettere ed Arti, pp. 31-57.

¹ Si ringrazie il prof. Giovanni Pessina, al temp gno primari, par vêmi fat cognossi Calligaris, e Gilberto

Antoniutti pe consulence linguistiches e pal lavôr di ricerca che e je stade impuantante pe scritture dal test.